



Seramai 30 pelajar Universiti Malaysia Pahang (UMP) hadir menyertai sambutan meraikan ketibaan para pendaki puncak Gunung Everest dalam Ekspedisi 'Everest FELDA 2013' yang dianjurkan Kelab Eksplorasi 7 Benua Malaysia (KE7B) dengan kerjasama Majlis Belia Felda dan Felda Global Venture Holding (FGVH).

Dalam program ini pelajar Fakulti Kejuruteraan Elektrik & Elektronik (FKEE), Myrza Fasha Md Hamyrudin, 25, dari Felda Tersang 3 Raub, Pahang merupakan salah seorang pendaki wanita bersama ketua pasukannya, Siti Hanisah Sharuddin, 23 dari Felda Jelai 1, Gemas, Negeri Sembilan disertai lima pendaki lain.

Mereka terdiri daripada Mohd. Nasuha Shamsudin, 21, dari Felda Tersang 3, Raub, Pahang, Mohamad Asyraf Mohd. Halim, 25, dari Felda Lok Heng Timur, Kota Tinggi, Johor, Muhammad Hafizuddin Ibrahim, 22, dari Felda Chini Timur 1, Pekan, Pahang dengan ditemani jurulatih, Zainudin Lot, 37, dan Muhammad Illaham Ishak, 37.

Hadir menyambut ketibaan pendaki, Timbalan Menteri di Jabatan Perdana Menteri, Datuk Razali Ibrahim, Pengerusi Felda, Tan Sri Mohd. Isa Abdul Samad dan Presiden Majlis Belia Felda Malaysia (MBFM), Anuar Manap.

Sementara itu, Timbalan Naib Canselor (Hal Ehwal Pelajar & Alumni), Profesor Dr. Yuserrie Zainuddin berbangga dengan kejayaan Myrza yang mencatatkan sejarah dalam mengharumkan nama Malaysia di persada dunia.

"Kejayaan ini pastinya diiringi dengan semangat dan usaha bersungguh-sungguh demi menggalas tanggungjawab yang diamanahkan untuk mencapai kecemerlangan," katanya yang hadir sama menyambut ketibaan para pendaki di Lapangan Terbang Antarabangsa Kuala Lumpur (KLIA) pada 1 Jun 2013 yang lalu.

Tambah Profesor Dr. Yuserrie, pihaknya juga sedang merancang untuk mengadakan program perkongsian pengalaman pendaki bersama pelajar UMP dalam sedikit masa lagi.

Bagi Myrza yang meminati aktiviti lasak berkata, semuanya bermula apabila beliau berpeluang bertemu pendaki wanita muda pertama Malaysia, Marina Ahmad ketika menjalani sesi latihan menawan Puncak Kinabalu anjuran Pusat Sukan dan Jabatan Hal Ehwal Pelajar & Alumni (SAFFAD) pada tahun lalu.

"Hasrat untuk menawan puncak tertinggi dunia, Gunung Everest dipendam sehinggalah beliau berjaya dalam temu duga dan melepasi semua saringan serta terpilih sebagai salah seorang pendaki dalam menggalas harapan warga FELDA serta mengharumkan nama Malaysia bagi merealisasikan Ekspedisi Projek Everest FELDA 2013 ini," katanya yang gembira disambut rakan-rakan dan keluarga.

Beliau yang aktif dalam sukan dan aktiviti anjuran T-Rex UMP turut berterima kasih atas sokongan semua pihak dan berkat restu ibu bapanya, Siti Zaunah Mat Tenan, 47 dan Hamyrudin Mohd. Hashim, 55 yang banyak mencetuskan inspirasi kepadanya

untuk terus melangkah dalam mencapai misi sehingga berjaya mencatat sejarah untuk dirinya, keluarga dan negara.

"Persediaan dalam membina ketahanan mental dan fizikal amat penting di samping berdoa kerana pelbagai kemungkinan boleh berlaku akibat cuaca serta keadaan di pergunungan yang berais membahayakan pendaki," katanya yang berkongsi pengalaman yang sungguh mencabar tatkala merentasi cerun jurang ais yang boleh menyebabkan pendaki jatuh sekiranya ais mencair.

Beliau menasihatkan mereka yang berminat dengan aktiviti lasak dan pendakian agar membanyakkan latihan dan stamina fizikal. Kini, dengan kejayaan yang dicapai, Myrza yang berada di semester akhir ini tidak lokek untuk berkongsi pengalaman bersama rakan-rakan lain selain bercadang untuk melibatkan diri dalam program kesukarelawanan dan motivasi dalam kalangan generasi muda.

Tidak mengenali penat, dia kini menyimpan hasrat untuk menawan enam lagi gunung tertinggi bagi melengkapkan eksplorasi menawan tujuh benua. Malah, beliau turut menjadikan pendaki tujuh benua, Muhammad Muqarrabin Mokhtaruddin sebagai ikonnya untuk merealisasikan impian ini.

"Kita perlu mencabar diri untuk melihat sejauh mana kemampuan yang dimiliki," kata Myrza yang mempunyai jiwa dan semangat yang kental untuk terus berjaya.

